



Il Chor viril Riom-Parsonz-Cunter ha organisà bain la radunanza ed er dà a quella il vestgi cantic.

FOTOS G. N. STGIER

«Anc in onn, lura èsi propi finì»

Uniun chantunala da chant dal Grischun

DA GION NUTEGN STGIER / ANR

■ **Naginas vistas da chattar in chanta-dur ubain ina chantadura per la successiun da Retus Giger sco president da l'Uniun chantunala da chant. En trais onns duai avair lieu la Festa da chant chantunala ed er qua è la speranza pitschna da chattar in chor che surpiglia l'organisaziun.** La vischnanca da Riom, cun il Chor viril Riom-Parsonz Cunter e cun l'uniun da dunnas da quels trais lieus vischins, han retschet cun plaschair delegadas e delegads dals 130 chors da l'Uniun chantunala da chant dal Grischun. Umens e dunnas da quellas trais vischnancas èn stads ospitants generus ed il chor viril ha confermà che er en quels trais lieus viva il chant. Sut la direziun da *Rudi Collet* ha il chor dà a la radunanza il vestgi cantic e *Marc Mareischen*, il president dal chor, ha cun ses team organisà cun bler amur l'occurrènza per porscher a tuts in di empernaivel a Riom. *Retus Giger*, il president da l'Uniun chantunala da chant dal Grischun, ha lura er engrazià al chor per sia bainvulientscha da surpigliar spontanamain l'organisaziun da la radunanza. Fin a l'entschatta da quest onn aveva nagin chor mussà interess da retschaiver chantaduras e chantadurs dal Grischun e porscher a quels tetg per lur radunanza 2015.

«Chantar è wellness per l'olma»

A chaschun da la radunanza a Riom èn er vegnids undrads chantaduras e chantadurs fidaivels da noss chors. 32 umens

ed 11 dunnas han retschet la reconu-schientscha chantunala per lur commembranza da 30 onns tar in chor. Da quellas 43 chantaduras e chantadurs derivan gist 28 da chors rumantschs ed in da quels è tranter auter er Retus Giger, il president da l'uniun chantunala. El è dapi trais decennis commem-ber dal Chor mischedau Surrein e da preschent er dirigent da quella furma-ziun. Gist 28 chantaduras e chantadurs dastgan da nov sa numnar veterans federals cun esser dapi 35 onns fidaivels tar in chor. Da quels chantan schizunt 17 en in chor rumantsch. Retus Giger ha alura gratulà a tuts undrads è manegia che chantar saja wellness per l'olma e che chantaduras e chantadurs vivian schizunt pli ditg.

Esser loschs da nossa cultura

Cusseglier guvernativ *Martin Jäger* ha ditg che la cultura da chant en il Grischun vivia anc adina. Strusch ina regiun en Sviza haja ina cultura uschè vasta sco il Grischun. Il minister da cultura da noss chantun ha ditg che nus Grischuns dastgian esser loschs da nossa cultura. Il chantun sustegnja gugent la cultura e quai betg mo la cultura professiunala, mabain er la cultura amatura. En in onn vegnian inoltradas a ses departament 1000 dumondas da sustegn e da quellas vegnian 800 resguardadas e sustegnidas, ha menziunà *Martin Jäger*. L'armonia dad in chor fetschia bain a tuts ed ils texts da las chanzuns sajan schizunt da gronda impurtanza per dar a mintgin ina tscherta forza.

Suenter 14 onns sa retira Josy Bonolini

Retus Giger aveva inoltrà sia dimessiun suenter esser stà 12 onns president da l'Uniun chantunala da chant dal Grischun. La tschertga per in successur ubain ina successura è dentant stada senza success uschia ch'il president actual è sa mess a disposiziun per in ulteriur onn per quel uffizi. «Anc in onn, lura èsi propi finì», ha ditg Retus Giger. A fin va er la lavur da *Josy Bonolini*, la dunna da Schluein ch'è stada 14 onns en suprastanza da l'uniun tetgala da chantaduras e chantadurs da noss chantun. Ella era responsabla per la partiziun dals veterans e ses uffizi ha ella fatg cun bler plaschair. Da nov en la direziun da l'Uniun chantunala da chant dal Grischun han ils preschents elegi *Lukas Moos*, il scolast da Lai. Confermads per quel gremium èn vegnids *Jeanetta Meier Valer*, Fajauna, *Michela Duschetta Forer*, Zernez e *Jürg Wäsescha*, Savognin. A la cummissiun da musica fan da nov part *Flavio Bundi* da Glion, *Tanja Däscher* da Saas e *Selina Fluor* da Samedan. Quellas trais persunas giuvnas remplazzan *Remo Gianotti*, Castasegna, *Andrea Schmed-Camathias*, Laax ed *Andrea Veraguth de Groot*, Vuorz. President da la cummissiun da muscia resta er en l'avegnir *Heinz Girschweiler*, Cuira, ed a quella cummissiun stat er *Manuela Bühler*, Winterthur, fidaivla sco commembra. En il futur vegn *Martin Zimmermann*, Aschera, a represchentar noss chantun en l'Uniun svizra dals chors, el remplazza *Luzius Hassler*, Favugn.



Ina rotscha chantaduras e chantadurs èn da nov veterans chantunals e federals.



Appartegnan da nov a la cummissiun da musica: Selina Fluor, Flavio Bundi e Tanja Däscher (da san.).



Preschents a Riom èn er stads ils tschintg presidents dals districts da chant: Roland Lutz, Ewald Vinzens, Lucian Bigliel, Roland Capeder ed Armon Parolini (da san.).



Giast a Riom è er stà Giovanni Netzer, l'intendant da l'Origen Festival Cultural. Qua cun Carolina Bearth d'Ardez.



Josy Bonolini (san.) sa retira sco commembra da la direziun da l'uniun ed Andrea Schmed-Camathias sco commembra da la cummissiun da musica.



Il chantadur Ramun Venzin (san.) cun il cumponist Gion Balzer Casanova.